

Kapítulo 11

MASONISMO I MORMONISMO

Promé ku nos kontinuá nos estudio di doktrinanan mormon, ta importante pa nos ripará e iglesia aki su lasonan ku masonismo pa nos por komprendé nan siñansanan.

Masonnan lo no atmití ku masonismo ta un religion, ku kada 'lodge' ta un tèmpel di religion. Ma nan siñansa ta leu di esun di kristianismo. Kòrdando ku Lúsifèr ta un nòmber pa Satanas i Adonai ta un nòmber hebreo pa Dios, ta interesante kon Albert Pike, gran komandante mason, na reunion di lídernan di masonnan, a splika nan filosofia anti-Dios:

"Si, Lúsifèr ta Dios, i desafortunadamente Adonai tambe ta dios...pasobra e apsoluto por eksistí solamente komo dos dios...P'esei...e religion filosófiko, bèrdadero i puru ta e kreensia den Lúsifèr, e igual di Adonai; ma Lúsifèr, Dios di Lus i Dios di Bondat, ta luchando pa humanidat kontra Adonai, e Dios di Skuridat i Maldat."¹

E promé 12 añanan di historia di iglesia mormon, Hosé Smith a denunciá tur grupo sekreto manera masonnan. Ma ta parse ku despues, Smith a haña un interes pa ku masonnan, i e mes a bira un mason 16 mart 1842. For di e tempu ei, el a kuminsá inkorporá hopi práktika i kreensia mason den mormonismo. Por ehèmpel, ni dos luna despues ku Smith a djòin e masonnan, el a inisiá un seremonia sekreto den tèmpel 4 di mei 1842. Hopi similaridat entre mormonismo i seremonionan den e tèmpelnan mason a resultá: nòmbernan sekreto, kastigunan, huramentu bou pena di morto, sierto manera di duna man, símbulonnan di masonnan paden i pafó di e tèmpelnan mormon, símbulonnan astrológiko, e wowo di okultismo, e strea di sinku punta kabes abou, èts. Esaki no a sosodé pa kasualidat.

Ora Hosé Smith a bira miembro di e masonnan, su siñansa a kambia. El a kuminsá hasi chèrchè di e doktrina di e trinidat, siñando ku tin hopi dios, ku e Tata, Yu, i Spiritu Santu ta tres dios distinto. Tambe el a kuminsá siña ku "Dios" ta un hende pekaminoso ku a bira divino i ku hende por bira dios.

Dr. Reed C. Durham, Jr., presidente di Asosiashon Histórik mormon, a duna un charla 20 di aprel 1974 ku a kai manera un bòm pa iglesia mormon. El a dokumentá frankamente Hosé Smith su lasonan ku e masonnan. Kasi nan a ekskomuniká profesor Durham for di iglesia mormon. El a skapa esaki dor di skirbi un karta re-afirmando su fe den e iglesia ku e profeta Hosé Smith a funda. Dr. Durham a bisa:

"Mi ta konvensé ku dor di un estudio di masonismo por haña e yabi klave pa komprendé Hosé Smith i e iglesia mas aleu... E hopi paralelnan haña entre mormonismo i masonismo di e era ei ta hopi: konferensianan, konsilionan, saserdosia, tèmpelnan, huntamentu ku zeta, dunamentu di sèrtifikadonan,

sertifikadonan pa identifiká obreronan lehítimo...ansianonan, sumosaserdote-nan i asta e buki di lei ...kosnan egipsio, revelashonnan nobo di solonan i lunanan, gobernashon di planetanan i streanan fihá [miéntras esakinan tabata] úniko pa ku mormonismo nan tabata normal pa masonismo.

Ma mas importante ainda, mi ta sugerí ku suficiente evidencia ta eksistí aktualmente pa deklará ku henter e institushon di e reino polítiko di Dios, inkluiendo e Konsilio di Sinkuenta, e konstitushon bibu, e bandera di reino proponé, i e ungimentu i koronashon di e rei, tabatin su orígen en konekshon ku pensamentu i seremonianan masóniko. No por ta pa kasualidat ku tur e konseptonan aki tabata un fotokopia di masonismo den e tempu di e profeta Hosé Smith."²

"E relashon será ku masonismo i mormonismo tin ku e religionnan misterioso pagano ta mas ku kla. Lo ta absurdo pa ignorá nan komo pa kasualidat. Tur ta aseptá e siguiente elementonan: 1) Ta enserá "misterionan"; 2) esakinan ta kompartí ku solamente un poko hende selektá; 3) pa risibí e misterionan aki bo mester ta pèrsonalmente digno; 4) un proseso di inisiashon ta un eksigensia; 5) e inisiashon ta inkluí ritonan sekreto; 6) esaki ta tuma lugá solamente den un siertu santuario, ku normalmente ta yamá tèmpeinan, i otro hende ta ekskluí; 7) durante e proseso, e partisipante ta hura ku e lo tene sekreto loke ta sosodé; i 8) kastigu pa revelá e "gnosis" (konosementu) sekreto aki na hende ku no a pasa den e rito aki ta morto."³

Laga nos enfatisá atrobe, tur e práktikanan i kreensianan aki tabata inkorporá den mormonismo *despues* ku Hosé Smith a djòin e masonnan. No por haña nan den e bukinan inspirá di mormonnan; i sigur no por haña nan den e otro Buki ku mormonnan supuestamente ta sigui, Beibel. Ta klaro ku e lídernan mormon a inkorporá esakinan for di masonismo.

Ta parse ku hopi mormon a bira mason i hopi mason a uni ku iglesia mormon. Aparentemente hopi di e lídernan mormon a bira mason, entre nan Hyrum Smith (Hosé Smith su ruman), Sidney Rigdon, Bigham Young, Heber C. Kimball. Señor Kimball a skirbi un karta pa Parley Pratt, bisando:

"Nos a organisá un 'lodge' di masonnan aki...kasi 200 a bira mason. Ruman Hosé i Sidney tabata e proménan ku tabata risibí den e 'lodge.' Tur e diesdosnan a bira miembro ku eksepsyon di Orson P. Pratt... Ruman Hosé ta bisa ku masonismo tabata saká for di e saserdosia, ma a degenerá...Nos tin e masonismo bèrdadero."⁴

Segun Reed Durham "ta parse ku e profeta promé a aseptá masonismo, i den e proseso a modifik'é, ekspand'é, amplifik'é òf glorifik'é."⁵ Dr. Durham ta konvensé ku Hosé Smith a keda un mason te na su morto. Ora e multitut a ataká e prisón unda Smith, su ruman Hyrum, i John Taylor tabata será, Hyrum a wòrdu tirá mata instantáneamente i Taylor a keda heridá. Smith, mirando esaki, a bai na bentana i a grita e grito masoniko pa ousilio na e otro masonnan pafó (obligando e masonnan di yuda nan "ruman" mason den nesesidat), bisando "O Señor, mi Dios..." Ma promé ku e por a kaba e frase ("O, Señor, mi Dios, no tin yudansa pa yu di un biuda?") nan a tir'é i el a kai morto dor di e bentana.

Den e promé vishon ku Hosé Smith a haña, e tabata instruí pa no uni ku ningun iglesia pasobra tur kredu ta un abominashon den Dios Su bista. Por bisa anto ku Smith a uni ku e masonnan pasobra nan si ta aseptabel den bista di Dios? Ta klaro ku mormonnan a rechasá kristianismo i a sigui e kreensianan mason. Nan tèmpeinan i kapèlnan ta dorná ku símbulonan

masóniko, miéntras no por haña e símbulo kristian, e krus, ni paden ni pafó di nan tèmpeñan i kapèlnan.

En bista di tur esei, ta sumamente strañu ku awor si mormonnan ta hasi hopi esfuerso i propaganda pa nan por ta konosí komo un religion kristian. Atrobe Dios a kiboká ora el a instruí Smith pa no uni ku un iglesia kristian? Si Dios no a kiboká, anto òf Smith a kiboká i no ta un profeta bèrdadero di Dios, òf mormonismo ta violá Dios Su instrukshon.

Komo ku José Smith a tuma hopi di e ritonan pa mormonismo for di masonnan, mormonnan no ta enkurashá nan miembronan pa bira mason. Ta parse ku nan no ke pa nan miembronan haña sa for di unda nan ritonan religioso ta tumá.

-
- 1
 - 2
 - 3
 - 4
 - 5